

I conscric enlouta... e anchecondi

Aldò de la tradizion i conscric tachèa a jir fora l di de Sèn Stefan, ma ades trop l'è mudà

La di de Sèn Stefan, ai 26 de dezesember, l'era dut na festa e ti scric de nesc autores, anter duc te chi de Simon de Giulio, vegn contà di festejamenc e de la veiora tradizion leèda ai conscric. I tousc conscric i scomenzèa a se fornir sù l ciapel con fiores de seida e de papier. Fajea bela parbuda ence la mesa coudes de gial sforcel e la cordeles de color che ge aea donà la conscrites. Apontin la femenes no les se enjgnèa nesciugn ciapel, ma l'era eles che ge donèa al conscrit che ge saea più belot o valent la cordela de sie gramièl.

Enlouta l'era i conscric che jia a se vadagnèr la mesacoudes fora per chisc bos: no i aea mia chi schiopes che i दौरa aldidanché. I cognea endrezèr furbaries per esser bognd de ciapèr l gial che i volea. Apontin chest raprejeta la mesacoudes del gial: la proa de esser doventé gregn.

I conscric che festejèa l'era chi che l'an dò i aessa cognù balotèr, duran vèlch balota te n bossol vegnia cernù i conscric che aessa cognù jir coi sudé. Autra tradizion di conscric

ne disc che chi che no passèa la vijita, enceben l'aesse arjont la maor età, l'aessa cognù se meter scedoles sul ciapel e na popa sul corpet.

I conscric tel passà i aea gran emportanza te la vita sozièla de la comunanza. L'era ic che fajea la gran mèscres, che fossa l Bufon, l Laché e i Marascons, i jia a fèr fum e i tolea pèrt a la bastia. Fin al scomez del Nefcent, i tegnia sù ence la Sozietà de la Bandiera.

La tradizion de festejèr chest emportant moment de passaje te la vita de ogneun la vegn portèda dant ence anchecondi, ma a na vida desferenta e tolan ite tant ic che eles.

A Cianacei l passaje del confalon

I a scomenzà en mèrtesc dadoman prest a širèr per la strèdes de paisc pienes de neif con na picola lesa. Spetan la funzjon, i conscric del 2002 i portèa con aiegria vita dò n an sci chiet e mestech.

Apontin la di de La Conzeta, descheche se fèsc da desvalives egn

en ca, ta Cianacei l'è stat fat l passaje del confalon di joegn dedicà a Sèn Luige Gonzaga dai conscric che va fora a chi che vegn ite. La messa é stata ofizièda da don Mario Bravin te la Gejia del Sacro Cher de Gejù e te la bela perdicia l'è portà dant na fona reflescion en cont al doventèr gregn. Arjonjer la maor età vel dir aer maor responsabilitèdes.

Dò n an dassen particulèr olache pech i a podù festejèr, i conscric del 2002 ge a passà donca l testamonech a chi del 2003, con la speranza che l'an nef ne porte endò a noscia vita da vigni di.

A Poza i conscric se à binà con Sèn Nicolò

Ence a Poza i conscric é ciutè fora, desche da tradizion l di de Sèn Nicolò patron del paisc. Tant la sabeda sera che en domenica ai 6 de dezesember i colores de sie bie ciapie à encolori la strèdes. Vèlch un de ic aea ence n bel gramièl brun devent con dessegnes e fegures. Enviè da don

Andrea Malfatti i conscric à tout pèrt a la messa de la sabeda sera. Da Sèn Nicolò, dò n bon disnèr duc ensema i é jic a tachèr stroz fora per paisc dotrei lenzei con pensieres fora de anter e gustego. Anter duc sprizea 'Rime no n'aon più perché massa pecia bira aon beù' e 'L Covid l'è ruà ma i conscric no à mai molà'. I se à binà dapò con Sèn Nicolò, l'Agnol e i doi Krampus tedant a gejia grana e da La Conzeta chi che a podù i é jic amò a messa. NR

I set conscric da Soraga

Ai 8 de dezesember l'è la Conzeta e sagra a Barbida e ogne an te chesta ocajon a la messa vegn enviè ence i conscric da Soraga. Chest an no l'è stat l met de far la funzjon te la picola gejiola ma i fidei se à troà te gejia parochiala e la messa é stata ofiziada dal vicarie general de la Diozesa de Trent don Marco Saiani.

I é de set i conscric del 2002 da Soraga, 4 tousse e 3 fenc, e duc chenc a tout part a la funzjon e i l'è animada con le lecture e le orazion di fidei.

Dant del scomez de la messa don Andrea, che era a ciasa en carantena, l'è fat na videochiamada per saludar si fidei e ge augurar na bona sagra; n salut particular l'è volù ge l sporjer ai conscric senté jù tedant con si ciapie bie furni sù da fiores e cordeles per i fenc e sia maia per duc valiva.

La funzjon é stata solene, ciantada bel da la Corala Sènc Piere e Paul e le paroles sentude del vicarie general. Te la perdicia don Marco l'è recordà la fegura de Maria che la é stata cernuda per conzepir Gejù, l'è cognù aer n gran coraje, ajache enlouta – à dit don Saiani – le tousse che restaa autrament dant de se maridar vegnia sassinade. Ence voi cogne de aer coraje desche Maria – ge à dit don Saiani ai conscric – soraldut te chest moment grief e malsegur, coraje tedant a le endesfide de la vita. L Segnoredio ne chiama e l speta na risposta de amor, ence da voi l se speta na risposta de amor. Ve augure de aer semper ape de voi Maria e l Segnoredio, desche ejempies e amis de vita. MO



I conscric da Cianacei.



I conscric da Poza.



I conscric da Soraga.